

五臺縣志 卷之二

星輿志目錄 計十二條

畢圖

分野

沿革

形勝

疆域

山川

八景

五臺縣志

卷二

風俗

士習

民業

鄉儀

節序

星輿志

聖天子協天紀辨地方政治之大無踰於是臺邑蕞爾  
邊隅雖遠遜通都大邑然一爲之考因革而辨疆  
域俾覽之者明天人倚伏之機隨時補救以期治  
臻上理其有關於國政與民生者顧不重歟志星  
輿



星野

星曰畢辰曰酉次曰實沈令曰芒種封曰冀州按周禮保章辨九州之地所封封域皆有分星以觀妖祥張衡曰地有山嶽以宣其氣精鍾爲星列居錯峙各有適屬司馬遷天官書曰昴畢冀州帝王世紀曰自胃七度至畢十一度爲趙之分自畢十二度至東井十五度爲晉魏之分天文志曰自魏郡濁漳之北得漢趙國廣平鉅鹿常山東及清河信都北據中山真定全趙之分又北逾衆山盡代

郡鴈門雲中定襄之地俱爲畢分晉志曰自胃七度至畢十一度爲趙分隋志曰舜析冀州而爲幽并其於天文胃畢爲冀州兩漢天文志考星之變實以漢之事異與前數家所言槩合雖史家以事後言之多爲巧合大畧豈盡謬乎論者以子產辨實沈之爲崇以爲全晉之地俱當屬參豈知山河疆界自漢以後漸有開拓欲以後日之州縣盡統乎古人之分域必不然矣特古之占者以河山爲界而不拘於方國也及唐李淳風撰法象志因漢

十二次始以唐之州縣配焉嗣後占候率因此法然歷代之沿革不同隸屬時改執古人之法以律今此躔舍之所以不合也故唐志曰魏徙大梁則西河合於東井秦拔宜陽則上黨入於輿鬼方戰國未滅時星家之言屢有明效今同在畿甸之中矣而或者猶據漢書地理志推之是守甘石遺術而不知變化者也然按今日省縣與漢晉隋唐宋元迥不相同惟明距今未遠而州縣亦未更改誠意伯劉基爲一代星緯之宗其分野云太原入畢

五臺縣志

卷一

四

初度而臺得六度則臺之屬畢無疑也後之察災祥者其驗於此爾

步天歌曰畢乂八星恰似爪附耳左股一星光天街兩黑畢背傍天節下八烏幢停畢上烏列六諸王王下四皂天高星節下團圓九州域畢口斜對五車口車有三柱任縱橫車中五黑天潢精潢畔咸池三黑形天關一星車脚間參旗九個關下懸旗下九旂九烏連旂下十三烏天園九旂天園參

脚邊

占候

畢十七度主邊兵弋獵其大星曰天高一曰邊將  
明大則遠方來貢失色邊兵亂動搖邊兵起甘氏  
云畢主街巷陰雨天之雨師也張衡云畢爲天馬  
昴畢間二星曰天街主國界金火守之邊兵起附  
耳主聽得失星盛主中國微有盜賊邊堠驚動移  
則讒佞行兵大起天節主使臣之所持也諸王六  
星主宗藩天高在參旗西畢兵北此臺榭之高主  
遠望氣象不見官失守五車三柱主天子五兵北

天庫主秦東北天獄主燕趙東南天蒼主衛魯中  
央曰司空主楚西南鄉主魏五星有變各以主占  
之又填星舍五車燕代大旱三柱一曰三泉一曰  
休一曰旗五星明柱皆見則倉廩實一曰天子得  
靈臺之禮則五車三柱均明有常天潢五星主河  
梁津度咸池三星在天潢南魚圍也天關亦曰天  
門主邊事主關閉參旗九星天旗也明而稀則邊  
警不動流星入北地兵起玉井西南九星曰九旂  
天子之旗也主邊軍進退金火守之兵亂起天苑

之南十三星曰天園植果菜所也

按舊志云臺邑屬畢宿分野考要云畢爲天之雨師傳曰畢星好雨詩曰月離於畢俾滂沱矣武王伐紂上祭於畢是也星經畢宿計星十七座畢八星天高四星附耳一星參旗九星九旂九星五車五星三柱九星柱分三座天關一星天潢五星天節八星天園十三星咸池三星九州九星天街二星舊圖止列十五座無九州天街二座星經云九州殊口在畢宿之下步天歌所謂節下團圓九州

域是也又歌云天街兩黑畢背傍天街二星在昴畢間日月五星出入要道主伺候關梁又主國界街南爲華夏北爲外國此兩座舊志占候中亦不載又天潢五星舊圖止列四星天園十三星舊圖止列十一星今悉改正俾歌與圖合至於經緯躔度之微密非精於術數者不能茲不敢臆測云

沿革

五臺按禹貢爲冀州域成王封唐叔於晉屬晉戰國分晉地之一屬趙秦分三十六郡屬鴈門郡漢

置慮虜縣屬太原郡晉罷北魏太和十年復驢夷  
縣新興郡永安中隸永安郡北齊改屬鴈門郡隋  
大業初改爲五臺縣隸鴈門郡唐隸代州五代及  
宋因之金貞祐四年三月升臺州隸河東北路元  
隸冀寧路明洪武二年爲縣隸太原府

國朝因之雍正二年改隸代州

照省志增定

形勝

東跨五臺南襟沱水西帶泉巖北枕楊嶺巖阜環  
拱川谷重複彈丸一邑巋然中藏

五臺縣志

卷一

七

疆域

縣東至直隸阜平縣龍泉關一百二十里南至孟  
縣牛道嶺八十里西至崞縣榆車嶺八十里北至  
代州楊林嶺四十里東北至繁峙縣東峨嶺一百  
里東南至直隸平山縣黑山關九十里西南至定  
襄縣芳蘭鎮四十五里西北至代州西峨嶺八十  
里在代州南一百二十里在  
京都西南九百里境內以西北計一百二十里以  
東西計二百里

山川

臺山在縣治東北一百二十里環五百餘里上有五峯高出雲表頂皆積土平廣如臺故謂之臺世傳北方有文殊師利所居之地卽此也中臺高四十里平廣六里西北有太華池取水禱雨輒應正東五里有雨花池西有甘露池南有靈鷲峯前二十五里有飯仙山東臺高三十八里平廣三里頂東有那羅延洞風甚寒盛夏有冰五色雲常出東有樓觀谷內有習觀巖西北十五里有華巖嶺仙

人洞東南二十里有明月池臺下有青峯東谷池温湯池温泉寺西臺高三十五里平廣二里上有魏文帝人馬跡北有秘魔巖洞天陰中有聲如風雨嶺畔有薩埵崖捐身巖臺西有八功德水東北下有文殊洗鉢池南臺高三十七里平廣二里麓畔有聖鐘山狀如覆鐘西北十五里有金閣嶺嶺西北有清涼泉清涼石上有羅漢洞東北有竹嶺北臺高三十八里平廣周三里南畔有羅睺臺頂有黑龍池卽天井南下二十里白水池與天井連



其麓有七佛池飲牛池東有寶陀峯又有寶山產銀石碌天花東北二臺麓有金剛窟

邑在萬山中難以屈指數其最著者五峯北臺名叶斗峯視斗杓如可挹風雲雷雨出自半麓登斯臺也北眺沙漠南望雲天令人有萬里搏空之想由北臺而東四十里至東臺西南四十里至中臺又西四十里至西臺皆接脊相連中臺名翠巖峯高四十里丹崖翠巘飄緲浮雲實衆山發脉之祖從此南下一支既伏而起蜿蜒磅礴屢起屢伏突

出一峯小於羣山名靈鷲嶺一名菩薩頂左右兩山翼水而行合流廻向而後去兩支山龍蟠虎踞而飯仙山當其案下舊設巡檢司後裁去今復設東名望海峯朝觀紅日湧輪若駕海而上又名無恤臺以趙簡子曾獵於此云西臺名掛月峯月下西天如懸鏡南臺名錦繡峯金蓮曰菊佛鉢諸花爛若錦繡古名繫舟山相傳帝堯避水繫舟於此其間靈跡仙景甚多最奇者則清涼石石方平自然紋理計厚六尺餘幅幘四丈七尺許其上能容

數百人然石不附山撼之可動極爲神奇柳宗元稱雲代間有靈山與竺乾鷲嶺相應角立東峯有離岳火珠西峯有麗農瑤石南峯有洞光珠樹北峯有玉潤瓊枝中峯有自鳴之金環光之碧正謂此也其川則滹沱河卽山海經載秦戲之山多金玉沱水出焉者三漢合流北經繁峙西環代崞南抱五臺趨常山東北入海臺五溪發源二溪左注清河三溪右由西臺出峩口入滹沱水經云峩谷之水出於中臺是也其他詳載清涼志

近城亦有五臺之目由臺山而西南百餘里嶺斷峯連至楊林嶺而開嶂更南行數十里至青山孤嶂獨秀則縣中之北臺也松林茂密疊嶂重巒北眺臺山南瞻沱水爲一縣鉅觀南臺則南神塢上建漢文帝廟匾曰漢代仁宗廟後古松數株蒼老若虬龍東臺有天蓬塢東山一帶接脊纏連一峯獨高上有八蜡廟西臺則紫羅山青松鬱然茂樹嘉蔭至者輒憩息忘歸峯山則縣之中臺其來龍自青山而南火星高聳土星蜿蜒至峯山而金星

突兀爰結臺城頂上舊有文昌廟西南兩小峯相連形如覆釜稱爲聯珠金星爲合縣龍山山半有古龍神廟禱雨極靈應廟之創建無所考得古碑蓋重建於金天眷二年又重建於元至正十三年

明洪治甲子復重修云 二條採舊抄志補入

峯山 在縣西北二里許詳八景

龍泉山 在縣北五里

天蓬山 在城東十五里

青山 在縣西北十里巍然高聳青松茂密舊云有仙人居此

五臺縣志

卷二

十一

小王村山 在縣北十里山下出清泉味甘春日常有寸餘鯉魚湧出無算河芹不種自

生此盧澆河之源也

蘆虎山 在縣西十五里狀如伏虎

玉皇塢 在縣北三里上有玉皇廟

閣嶺山 在縣東北十里詳八景

圍塢山 在縣西南二里許詳八景

寶髻山 在縣南十里有香爐峯真潛洞避雨巖出碧陽砂有蒼松一株石碁盤相傳仙人奕碁於此

抓髻山 在縣南十五里兩峯尖秀如髻

紫羅山

在縣西南八里峯巒高峙蒼松茂鬱翠栢一株繁蔭曲幹可玩建臺駘神廟

莎泉山

在縣東南十五里有莎泉寺

鳳塢山

在縣南十五里東西兩山相接低昂起伏如鳳鸞盤翥之形

栢嶺山

在縣南二十五里

東峨嶺

在縣東北八十五里

錦屏山

在縣北二十五里石壁層巒巖花林樹色若錦屏

月掛山

山上一孔玲瓏如月

煖泉山

在縣東南四十里有煖水泉福田寺

天和山

在縣東四十里有龍洞泉出鐵沙礮器石炭

五臺縣志

卷二

十二

筆架山

在縣南二十里三峯高聳如筆架

虎陽嶺

在縣東三十五里有古刹後人建閣

烏牛山

在縣東八十里山下石壁峻峭洞有水泉風致異常

紗帽山

重崗屈曲形如紗帽

突兀山

在縣南四十里狀如筆峯峯上建老君祠昔有人題句云突兀峯何峻月明鶴自棲

相看不成寐起聽麓南溪

蝎虎山

在縣東南七十里山前有村名孫家庄去村里許則多蝎村中絕無間有亦不傷人

白羊山

在東峪村東丹嶂萬仞自下望之崖腹有白羊奔躍狀

東明山

在縣東四十里山腰一孔與縣西月掛山相望

鐵拐山

在縣東五十里削壁千仞中插二拐相傳為仙人所遺石上有詩云一川流水漫何以促征桴空插山頭拐舟人但仰呼

寨塢山

三峯峻秀儼如筆架

黑山

轉緣百折林木叢茂東高四十里為五臺西高五里為平地

五洞山

在縣南四十里俗傳出五金今產煤炭

黃石山

水下數仞

段畝山

在縣南四十里出紫綠紋石堪為硯一文山

仙跡山

山上有一足跡

簡子山

在縣南四十里有趙簡子廟

五臺縣志

卷二

十三

黃金山

在縣西五十里盤亘一方上有龍王廟禱雨輒應

西峨嶺

在縣西南七十里石盤百轉

九女山

在縣北四十里有九仙巖碧霞元君祠

石版山

有二泉

仙人山

在縣東南五十里石巖上有仙人坐跡山腹有手跡山下有足跡皆西向

獨龍山

在縣東北四十里山腰有泉細流水極甘潔

二仙山

在縣東北四十里巖間二石遠望如人一座一立

蓮花山

古竹林寺後山

象山

在縣北五十里青松數百下有梵剎名蘭若

皮箱崖

硃書十六字天然生成人莫能識崖腹懸一皮箱攀不能及昔人題崖壁云一索懸方筭人傳中有書千年容易過何發瓊

硃砂崖

赤色如硃傳為仙人所吐

審戶崖

行者捫崖魚貫狀若審戶

射虎川

在縣東北一百三十里康熙二十二年得名詳藝文

神武泉

在射虎川

盧虎河

一名慮虎源出王村環縣東南入南峪與盧陽清水合入滹沱明天順間知縣李華令民引渠溉田名曰豐樂

滹沱河

由河邊村入臺境至南峪河門與縣三河合

五臺縣志

卷二

十四

虎陽河

在縣東北四十里平地發源入峽口經東明山下至河口與清水河合

清水河

源出華崑嶺南流至石嘴與射虎川合

泉巖河

在縣西三十里源出泉巖村至槐陰入滹沱

東峪河

發源白羊山經東峪村至陡寺與黑龍池合經移城村孫家庄百蘭村灌田入河門與滹沱合

聖阜水

在縣西南四十里水側石上有二手跡一足跡

沙沛泉

在縣城南門外水味甘香時旱不雨山人張平山蓋龍王廟於其上識者謂為不宜

龍池

在獨龍山下去地丈餘有石罅清泉出焉天旱禱雨於此

九女泉

在縣西北峯山下上有黑風洞其水稍温流數步與盧虎河合

建安潭

在縣西南三十里稍温有魚

明月泉

相傳以紗帛障日下視或見月在水中

龍泉

在縣北五里龍掌峪南

龍灣泉

在西峽村北詳八景

魚洞泉

在河口南每谷雨日滿尺魚出數頭則歲

臥虎泉

出盧虎河之頤卽河源也泉溢則發科或

馬跑泉

出探頭村下

濟難泉

在避事塢上不涸不流

東峩峪

原出於中臺太華池

五臺縣志

卷二

十五

龍洞泉

出天和山

茹湖

詳八景

油盆池

在黑山下龍常見形深不可測禱雨靈應

石蓮池

池石皆蓮花形

東峪溝

自黑山關抵城下百里澗遶山行水流曲

孤嶼溝

兩山對峙寬僅數武澗深五六丈細泉循

野馬溝

自探頭抵滹沱七十里

石盆溝

自茹村抵東河口三十里

石槽溝

自河東口抵城南四十里

北嶽池

在縣東九十里石堦內有天然石盤大小計十八盤水注其中冬夏不涸亦不流出

八景

閣嶺白雲似臥

嶺有夾道時屯白雲遠望如臥龍

林泉晚照人家

在縣北三里許晚日光照人家

峯山無樹落松花

其巔衍平有黑氣仙洞時落松花余按山石多天然松紋當指此

西望河陽月掛

地接峯山多楊樹夜月掛其梢余按當指月掛山

朝看黃圍雨霽

俗稱圍塢一峯聳峙每有雲戴其上即雨最驗

河邊落燕交加

即溱沔河淺瀨明沙社日燕集蘆荻盡黑

槐陰春色更堪誇

多槐樹春來各花先開二十餘日光景明媚

五臺縣志

卷二

十六

東冶秋光如畫

沃壤水田秋日稻熟田家景色可玩

邑中八景舊有西江月詞不知誰何氏所作後復

採景色稱佳者志八景焉

山城夜月

臺城甃石三層上始為垣夜憑粉堞摩霄望月倍加清絕

石窟躍魚

河門兩崖萬仞崖半有穴去水文許徑一尺每清明前穴中有魚充塞而出凡

五六日方止

閣道穿雲

見前

河邊歸燕

見前

龍灣煙雨

城東四十里有太師山山下大泉二曰龍池小泉近百山上長松數千覆之林



氣水風時含烟雨

茹湖落鴈

水聚成湖蘋蘩葦蓼映帶參差春秋鴈過有洞庭瀟湘之致

槐陰春色

見前

東冶秋禾

見前

風俗

剛柔燥濕地氣不同而四方之風氣因之晉省人情強悍顧亦果敢剛毅所由出也是在司土者有以倡率而整頓之

士習

五臺縣志

卷一

十七

臺鍾山川之秀士生其間者率多聰穎以故積學力行及通經足用者代不乏人

民業

臺民多依山而窟處艱於生業惟事耕鑿然平疇寬衍號稱沃壤者十不得一山地皆礪瘠一畝獲粟數斗又必肩負數十里始易金錢貿布絮焉

地不產棉婦女不知紡織雖尺布亦取給於市肆乾隆丁酉冬擇紳耆之年高有行者董其事官爲捐綿每婦女予一斤聘直省善紡婦爲之師更覓

善織者開局以廣其利噫是舉果成不惟人人挾  
續生計裕饒抑民勞則思思則善心生淫心舍力  
之憂吾知免矣

### 冠禮慶婚

婚以二姓通信舉媒妁送婚啓以求約誓之成過  
聘聘禮有金銀簪珥及羊豕果品諸物及笄則請  
期如期親迎于歸拜尊長三日謁祠堂

### 喪

遵禮制

### 祭

宗祀歲四時有祭生日忌辰有祭每清明及上元  
中元下元皆墓祭

孟冬朔日祭祖先送寒衣剪楮爲之

冬至日祭祖先士大夫家亦有拜賀者

季冬八日取諸米雜豆果肉爲粥食曰臘八粥廿

三夕以糖餅祀竈拂塵除夕易門神桃符貼宜春

### 多嫁娶

### 附田家五行記

古人欽若天道在於敬授民時故夏小正周豳雅

重農事焉然其義微與民罕能喻茲故雜以諺謠  
爲田家五行記正月斗建寅自元日祈穀日皆欲  
晴占曰一鷄二犬三猪四羊五牛六馬七人八穀  
晴則其物育陰雨災是月也農始治田蓄水元夜  
初日占百果中日早稻末日晚稻諺云雨打上元  
燈早禾一束藁月下旬率鋤圃爲畦乃孳桑鷄乃  
嫗伏育子二月昏弧星中驚蟄雷鳴先節鳴多雨  
是月穀乃滋種乃播不欲寒始理蠶事祭社祈穀  
實圃殖胡麻芋木棉三月參則伏三月聽蛙上午

鳴原田熟下午鳴濕田熟唐人云田家無五行水  
旱卜蛙聲是月上中旬分秧立苗婦乃蠶事用清  
明日占晴雨晴則蠶宜桑貴收春芥爲菹殖蔴藍  
菽四月日在畢八月雨吉立夏日小滿日率宜雨  
諺云立夏不下高田放罷小滿不滿芒種莫管以  
梅實卜秫田穰歉諺云樹無梅手無盃是月也農  
乃登麥晚禾立苗婦女緝葛績麻五月招搖指南  
斗參則見農喜是月大雨諺云大旱不過五十三  
率驗又二十日爲分龍日二十五日爲回龍日數

日不雨則穀歉諺云分龍不下回龍下回龍不下  
乾啞啞圃灌藍收梅小麥乃登六月初昏斗柄在  
上卽立秋在月晦則旱稻秋始熟諺云六月秋要  
到秋七月秋不到秋圃乃艾藍七月昏建星申七  
夕前占河影影秋三日見則穀賤七日後見穀貴  
農乃登穀祭田祖食新穀圃殖菘殖芥八月日在  
角是月及來月率種麥圃剝瓜收胡麻九月虛中  
霜始降白一日迄九日凡北風則穀賤以日占來  
年是月也農穫晚稻畢乃入山收薪樵伐木爲炭

十月織女正北嚮則旦是月婦女紡以燎繼日農  
始耕諺云十月雨連連高山也是田十一月斗建  
子乃修峙田器治其宅廬墻戶十二月日在婺女  
大小寒多風雨損畜四季甲子日喜晴諺云若要  
穀平四季甲子都要晴甲寅日喜雨諺云甲寅無  
雨六旬慳天時人事多驗用記以傳諸南畝按此  
記舊抄志有刻志無以其有關於民事也補入之